

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
18.10 सोमवार दिनांक 21.10.2024

प्रमुख समाचार –

- आज हरय पुलिस स्मृति दिवस – राज्यपाल अउ मुख्यमंत्री ह प्रदेसवासी मन कोति ले पुलिस के सहीद वीर जवान मन ल सुरता करत दीन श्रद्धांजली।
- राष्ट्रपति काली नई दिल्ली म पांचवां राष्ट्रीय जल पुरस्कार दीही-एमा छत्तीसगढ़ के ग्राम पंचायत मासूलपानी ल श्रेष्ठ पंचायत श्रेणी म दूसर स्थान बर करही सम्मानित।
- छत्तीसगढ़ राज्य निर्वाचन आयुक्त ह आयोग कोति ले जारी करे नामावली पुनरीक्षण कारीकरम के तारीख म करे हे फेर बदल- दावा आपत्ति बर आखिरी तारीख होही तीस अक्टूबर।

पुलिस स्मृति दिवस-01

आज पुलिस स्मृति दिवस के मउका म राज्यपाल रमेन डेका अउ मुख्यमंत्री विष्णुदेव साय रईपुर के माना स्थित चौथी वाहिनी छत्तीसगढ़ सशस्त्र बल के प्रांगण म राखे गे परेड कारीकरम म संघरीन। राज्यपाल अउ मुख्यमंत्री ह प्रदेसवासी मन कोति ले पुलिस के सहीद वीर जवान मन ल सुरता करत सहीद स्मारक म पुष्पचक्र चढ़ाके श्रद्धांजलि दीन। संगेसंग सहीद पुलिस अधिकारी अउ जवान मनके परिवार वाले मन ल साल, नारियल अउ स्मृति चिन्ह भेंट करीन। ए बेरा म राज्यपाल श्री डेका ह किहीन कि पुलिस के काम बहुते जवाबदेही के होथे। ओमन लोगन ले किहीन कि पुलिस करमचारी मन बर मानवता राखय अउ उंखर काम म मदद करय। राज्यपाल ह किहीन कि छत्तीसगढ़ म नक्सल समस्या ए गंभीर चुनौती हरय, जिहां हमर पुलिस साहस, धैर्य अउ निष्ठा के संग समस्या के सामना करत हे। कारीकरम म मुख्यमंत्री श्री साय ह किहीन कि

पुलिस स्मृति दिवस पुलिस बल के वीरता, बलिदान, देस प्रेम अउ सजकता के संग इतिहास के सुरता देवाथे। ओमन किहीन कि पुलिस जवान नक्सल पीड़ित क्षेत्र के विकास ल शासन के योजना के फायदा पहुंचाय म अपन योगदान देवत हे।

एखर पहिली राज्यपाल अउ मुख्यमंत्री आज राजधानी रईपुर के राजीव स्मृति वन के सहीद वाटिका पहुंचिन अउ हमर जवान स्तंभ म श्रद्धांजलि दीन।

पुलिस स्मृति दिवस-02

पुलिस स्मृति दिवस के मउका म आज प्रदेश के आने-आने जिला म घलो कारीकरम होवत हे। एमा धमतरी जिला के पुलिस लाइन म पुलिस स्मृति दिवस कारीकरम म पुलिस अधीक्षक आंजनेय वाष्णेय ह सहीद जवान मन ल फूल माला चढ़ाइन। उहें, रक्षित निरीक्षक दीपक शर्मा के अगुवई म जवान मन ल सलामी सोक शस्त्र के संग जवान मन ल श्रद्धांजलि दीन। धमतरी कलेक्टर अउ पुलिस अधीक्षक ह सहीद जवान मनके परिवार वाले मन ले हालचाल जानिन।

उहें, बस्तर म जगदलपुर के अमर वाटिका परिसर म पुलिस स्मृति दिवस के मउका म राखेगे सहीद परेड कारीकरम म बस्तर सांसद महेश कश्यप, महापौर साफिरा साहू, कमिश्नर डोमन सिंह, कलेक्टर हरीश एस. अउ पुलिस अधीक्षक सलभ कुमार सिन्हा समेत बड़का अधिकारी अउ जनप्रतिनिधि मौजूद रिहीन।

मासूलपानी-जल पुरस्कार

राष्ट्रपति द्रौपदी मुर्मु काली नई दिल्ली म पांचवां राष्ट्रीय जल पुरस्कार दीही। एमा छत्तीसगढ़ के ग्राम पंचायत मासूलपानी ल जल संरक्षण के क्षेत्र म बने काम करे खातिर राष्ट्रीय जल पुरस्कार ले सम्मानित

करे जाही। नई दिल्ली म राखेगे कारीकरम म कांकेर के नरहरपुर विकासखंड के ग्राम पंचायत मासूलपानी ल श्रेष्ठ पंचायत श्रेणी म दूसर स्थान बर सम्मानित करही।

खबर के मुताबिक मासूलपानी ग्राम पंचायत म पांच राजस्व गांव सामिल हे, जेमा नब्बे प्रतिसत आबादी अनुसूचित जनजाति के हे। जल संरक्षण बर ग्राम पंचायत म एक सौ इकसठ जल सेड संरचना बनाय गेहे, जेमा निनान्हे ठिन तरिया सामिल हे। एखर संगेसंग पंचायत कोति ले दू ठिन कुआ, दू भूमिगत बांध, तीन गेबियन अउ कतकोन निर्माण करे गेहे। एखर सेति लोगन मन सिंचई बर सतही जल ल बउरे बर सुरू कर देहे।

माओवादी मुठभेड़

दंतेवाड़ा म पुलिस अधीक्षक गौरव राय के आगू आज तीन झिन माओवादी मन ह आत्मसमर्पण कर देहे। आत्मसमर्पण करइया दू झिन माओवादी उपर दू-दू लाख रुपिया के ईनाम घोसित रिहीस। ए सबो माओवादी मलांगीर एरिया कमेटी म सक्रिय रिहीन। पुलिस के मुताबिक पुलिस वाले मन उपर हमला करे अउ सरकारी संपत्ति ल नकसान पहुंचाय जइसन मामला इखर उपर दरज हे। ए तीनो माओवादी करीबन सात-आठ बछर ले नक्सली संगठन म सक्रिय रिहीन।

इही बीच, छत्तीसगढ़ के सीमा ले लगे गढ़चिरौली के भामरागढ़ तहसील के कोपरी के जंगल म सुरक्षा बल अउ माओवादी मनके बीच मुठभेड़ होय के खबर हे। अभी तक मिले जानकारी के मुताबिक तीन ले चार माओवादी के मारे जाय अउ कुछेक माओवादी मनके घायल होय के समाचार हे। ए मुठभेड़ म नक्सल विरोधी बिसेस दस्ता सी-सिक्सटी ल मुठभेड़ के जघा म भेजे गेहे।

निर्वाचन नामावली-संशोधन

छत्तीसगढ़ राज्य निर्वाचन आयुक्त अजय सिंह ह बतइन कि आयोग कोति ले पहिली जारी नगर पालिका निर्वाचन नामावली पुनरीक्षण कारीकरम के तारीख म थोर बहुत फेर बदल करे गेहे। ओमन बतइन कि कुछेक जिला म निर्वाचक नामावली के संबंध म दावा आपत्ति मिले के आखिरी तारीख बढ़ाय के अनुरोध करीन। जिला ले मिले अनुरोध म आयोग कोति ले बिचार के बाद दावा आपत्ति मिले के पहिली तय आखिरी तारीख तेइस अक्टूबर ल बढ़ाके तीस अक्टूबर कर दे गेहे। उन्हें, निर्वाचक नामावली के आखिरी प्रकासन सत्ताईस नवंबर के करे जाही।

राष्ट्रपति दौरा—सुरक्षा

राष्ट्रपति द्रौपदी मुर्मु के पच्चीस अउ छब्बीस अक्टूबर के छत्तीसगढ़ दउरा प्रस्तावित हवय। दू दिन के दउरा के बेरा राष्ट्रपति कतकोन कारीकरम म सामिल होही। राष्ट्रपति के दउरा के सुरक्षा ल लेके तियारी सुरू होगे हे। सुरक्षा व्यवस्था बर पुलिस महानिदेसक अशोक जुनेजा ह निरदेस जारी कर देहे। राष्ट्रपति के सुरक्षा के पूरा तियारी रईपुर संभाग पुलिस महानिरीक्षक अमरेश मिश्रा ल सौंपे गेहे। राष्ट्रपति के सुरक्षा म आठ झिन डीआईजी अउ करीबन दस एसपी रैंक के अधिकारी तैनात रइही। एखर संगेसंग अतिरिक्त पुलिस अधीक्षक अउ डीएसपी रैंक के करीबन चौबीस ले जादा अधिकारी मनके ड्यूटी राष्ट्रपति के सुरक्षा म लगाय गेहे।

सिविक एक्शन—कार्यक्रम

नारायणपुर जिला के गांव ईरकभट्टी म सीमा सुरक्षाबल—बीएसएफ अउ पुलिस कोति ले सिविक एक्सन कारीकरम राखे गीस, जेमा गांव के लोगन के मुफत म स्वास्थ्य परीक्षण करे गीस अउ दवाई बांटे

गीस। उन्हें, गांव के लोगन ल रोज के बउरे के जिनिस के संगेसंग किसान मन ल खेती-किसानी बर कीटनाशक दवाई घलो बांटेन। एखर संगेसंग स्कूल लइका मन बर कापी, पेन अउ खेल जिनिस बांटे गेहे।

दुर्घटना

दुरुग जिला के पुलगांव म होय एक रद्दा दुर्घटना म तीन झन के मउत होगे। ए दुर्घटना पुलगांव थाना क्षेत्र के सीएम मेडिकल कॉलेज रोड म मांडले ढाबा तीर आज बिहनिया होय हे।

खबर के मुताबिक तेज रफ्तार टरक ह एक फटफटी सवार ल टक्कर मार दीस, जेमा एक महिला अउ एक लइका अउ एक पुरुष के मउकच म मउत होगे। उन्हें, दू बछर के एक नोनी के हालत गंभीर हवय जउन ल प्राइवेट अस्पताल म भर्ती कराय गेहे। दुर्घटना के बाद बड़ संख्या म लोगन मन रद्दा म चक्का जाम कर दीन। पुलिस अउ प्रशासन के समझाइस के बादे चक्काजाम खतम होइस।

सरगुजा प्राधिकरण –बैठक

नवा बने सरगुजा विकास प्राधिकरण के पहिली बइठका काली बाईस अक्टूबर के जशपुर म होही। बइठका के अगुवाई मुख्यमंत्री विष्णुदेव साय करही। बइठका म प्राधिकरण के उपाध्यक्ष गोमती साय के संगेसंग राज्य सरकार के ग्यारा मंत्री सरगुजा सांसद अउ नौ झिन विधायक सामिल होही।

मौसम

मौसम विभाग के मुताबिक अवश्या चौबीस घंटा म दक्षिण छत्तीसगढ़ के एक-दू जघा म छूटपुट बरसा होय या फेर गरज-चमक संग छीटा बौछार होय के संभावना हरय। खबर के मुताबिक एक निम्नदाब के क्षेत्र पूर्व मध्य बंगाल के खाड़ी अउ ओखर ले लगे उत्तर अंडमान सागर के उपर स्थित हे। एखर पश्चिम दिसा म आगू बढ़े अउ प्रबल होके अवदाब के रूप म काली बिहनिया तक बदले के संभावना हवय। ए अवदाब प्रबल के बुधवार के बंगाल के खाड़ी उपर एक चक्रवात के रूप म बदलही। उहें, एक निम्न दाब के क्षेत्र पश्चिम मध्य अरब सागर के उपर बने हे।

मीडिया टीम-त्रिपुरा

लोक कल्याणकारी योजना ल बने ढंग ले चलाय कला, संस्कृति अउ विरासत ल जाने बर छत्तीसगढ़ के चौदह सदस्यीय मीडिया टीम त्रिपुरा बर काली निकले हे। पत्र सूचना कार्यालय पीआईबी रईपुर के अगुवाई म ए टीम बाईस ले अट्ठाईस अक्टूबर तक त्रिपुरा राज्य के आने-आने जघा म घूमही। ए टीम म प्रिंट मीडिया, इलेक्ट्रानिक मीडिया अउ ऑनलाइन मीडिया के प्रतिनिधि अउ पीआईबी रईपुर अधिकारी सामिल हे। एखर संगेसंग ए टीम त्रिपुरा के राज्यपाल अउ मुख्यमंत्री ले भेंट करही।
